

ВИРУСЛИ ГЕПАТИТ А НИНГ ПРЕМОРБИД ФОН КАСАЛЛИКЛАРИ БЎЛГАН БОЛАЛАРДА КЛИНИК КЕЧИШ ХУСУСИЯТЛАРИ

Шукурова Н., 504-гуруҳ, тиббий педагогика ва даволаш иши факультети Илмий раҳбар: Умаров Т.У.

ТошПТИ, Болалар юқумли касалликлари кафедраси

Долзарблиги. Ўзбекистон Республикасида вирусли гепатит А касаллиги айниқса болалар ўртасида бугунги кунда ҳам тез-тез учраб турибди. Касалликнинг клиник кечиши ва лаборатор натижаларнинг қай даражада ўзгариши касалликни одам организмидага йўлдош касалликлари мавжудлиги ёки болаларда преморбид касалликларни намоён бўлиши билан боғлиқ бўлади. Айрим ҳолларда 1 ёшдан 14 ёшгача бўлган болаларда камқонлик, рахит ёки гипотрофия ҳолатларининг мавжудлиги вирусли гепатит А касаллигининг кечиш типиклигига таъсир кўрсатади. Натижада вирусли гепатит А касаллигининг клиник белгилари яққолроқ намоён бўлади, лаборатор биокимёвий кўрсаткичлар ҳам ўзига мос равишда юқори кўрсаткичларни ташкил қилади ва касалликнинг соғайиш муддатлари ҳам узоқроқ давом этади.

Мақсад. Преморбид фон касалликлари бўлган болаларда вирусли гепатит А нинг клиник биохимик хусусиятларини ўрганиш.

Текшириш материаллари ва усуллари. Тошкент шаҳар 5-сон юқумли касалликлар клиник шифохонаси ва 4-болалар юқумли касалликлар клиник шифохонасининг вирусли гепатит А бўлимида даволанган 1 ёшдан 14 ёшгача болаларда преморбид фон касалликлари бўлган 30 та бемор болалар ўрганилди. Барча беморларда вирусли гепатит А ташхиси ИФА усулида тасдиқланди, биокимёвий таҳлиллар ўтказилди.

Текшириш натижалари. Вирусли гепатит А ўрта оғир ва оғир шакллари билан оғриган 1 ёшдан 14 ёшгача бўлган 30 та бемор болалар ўрганилди. Беморлар 1-3 ёш, 3-7 ёш ва 7-14 ёш гуруҳларида таҳлил қилиб чиқилди. 1-3 ёшдаги болалар ўртасида ВГА касаллиги рахит ва гипотрофия каби преморбид фон касалликлари бўлган болаларда учради. Рахит ва гипотрофия фонида 1 -3 ёшда ВГА асосан ўрта оғир ва оғир шаклларда кечди. Бунда рахит 6 та беморда, гипотрофия эса 4 та беморда аниқланди, бундан ташқари рахит ва гипотрофия биргаликда келиши 4 та беморда ташхисланди. 3 -7 ёшдаги беморларда камқонлик ва гипотрофия жами 11 та бемор болаларда аниқланди. Бу беморларда камқонлик 4 тасида, гипотрофия 3 тасида, гипотрофия-анемия 4 та бемор болаларда ташхисланди. 7-14 ёшдаги бемор болаларнинг 5 тасида камқонлик ташхиси преморбид фон касаллиги сифатида қўйилди. 30 та ВГА билан оғриган преморбид фон касалликлари бўлган беморларнинг 22 тасида касаллик ўрта оғир шаклда, 8 тасида эса оғир шаклда кечди. Ўрта оғир шаклда кечганда беморларда дармонсизлик, иштаҳа сустлиги, кўнгил айланиши, қусиш, пешоб рангининг тўқлашиши каби клиник белгилар намоён бўлган бўлса, оғир шаклларда кечганда беморларда қўшимча уйқунинг нисбатан бузилиши, қоринда оғрикнинг бўлиши, бундан ташқари холестаза аломатларининг кузатилиши намоён бўлди. Беморларда касаллик ўрта оғир кечганда ўртача ётиш кунлари 18,7 кунни ташкил қилган бўлса, оғир шаклларида ўртача ётиш кунлари 23,4 кунни ташкил қилди.

Хулоса. Шундай қилиб, ВГА преморбид фон касалликлари бўлган болаларда кечиш давомийлиги ва касаллик клиник белгиларининг яққол намоён бўлиши кузатилади. Бу беморларда кечиш давомийлиги касалликнинг оғирлик даражасига яққол боғликлиги аниқланди.

Адабиётлар рўйхати:

1. Ахмедов, М. Д., et al. "ОЦЕНКА МОРФО-ФУНКЦИОНАЛЬНОГО СОСТОЯНИЯ ПЕЧЕНИ ПРИ ТОКСИЧЕСКОМ ГЕПАТИТЕ." Экономика и социум 10 (89) (2021): 492-501.